



中国经典名著

全宋词

(十二)

刘 丰 褚为良 編集

学苑音像出版社

目 录

王 炎.....	员
杨冠卿	園
辛弃疾	獪
赵善括.....	園

王 炎

蝶恋花 崇阳县圃夜饮

纤手行杯红玉润。满眼花枝，雨过胭脂嫩。
新月一眉生浅晕。酒阑无奈添春困。
唤起醉魂君不问。憔悴颜容，羞与花相近。
人自无情花有韵。风光易老何须恨。


又

柳暗西湖春欲暮。无数青丝，不系行人住。
一点心情千万绪。落花寂寂风吹雨。
唤起声中人独睡。千里明驼，不踏山间路。
谩道遣愁除是醉。醉还易醒愁难去。

点绛唇 崇阳野次

雨湿东风，谁家燕子穿庭户。孤村薄暮。
花落春归去。
浪走天涯，归思萦心绪。家何处。乱山无

— 员 —



数。不记来时路。

水调歌头

夜泛湘江

江月冷如水，江水碧於空。晚来一霎过雨，
为我洗秋容。悄悄四山人静，凛凛三更露下，
天阔叫孤鸿。唤醒蓬窗梦，身在水晶宫。

揖湘妃，招月娣，御清风。素琴韵远。不
觉醉眼杏花红。禹穴骑鲸仙去，东海钓鳌人远，
此意与谁同。倚舵一长啸，出壑舞鱼龙。

又

登石鼓合江亭

千里倦游客，老眼厌尘烟。蒸湘平远，他
处无此好江山。把酒一听欸乃，过了黄花时节，
水国倍生寒。输与沧浪叟，长伴白鸥闲。


傍江亭，穷杳霭，踞^砦砦岩。水深石冷，闻
道别有洞中天。待倩灵妃调曲，唤起冯夷短舞，
从此问群仙。云海渺无际，波涌缓移船。

念奴娇

菊

小妆朱槛，护秋英千点，金钿如簇。黄叶

— 圆 —



白苹朝露冷，只有孤芳幽馥。华发苍头，宦情
羁思，来伴花幽独。巡檐无语，清愁何啻千
斛。

因念爱酒渊明，东篱雅意，千载无人续。
身在花边须一醉，小覆杯中醺醖。过了重阳，捻
枝嗅蕊，休叹年华速。明年春到，陈根更有新
绿。

鹧鸪天 梅

淡淡疏疏不惹尘。暗香一点静中闻。人间
怪有晴时雪，天上偷回腊里春。

疑浅笑，又轻颦。虽然无语意相亲。老来
尚可花边饮，惆怅相携失玉人。

阮郎归

落花时节近清明。南园芳草青。东风料峭
雨难晴。那堪中宿醒。

回首处，自销凝。谁知人瘦生。倚阑无语
不禁情。杜鹃啼数声。



青玉案

深红数点吹花絮。又燕子、飞来语。远水平芜春欲暮。年年长是，清明时候，故遣人憔悴。

竹鸡啼罢山村雨。正寥落、无情绪。猛省从前多少事。绿杨堤上，楼台如画，此景今何处。

浪淘沙令

开禧丙寅在大坂作

流水绕孤村。杨柳当门。昔年此地往来频。认得绿杨携手处。笑语如存。

往事不堪论。强对清尊。梅花香里月黄昏。白首重来谁是伴，独自销魂。

木兰花慢

绀桃花树下，记罗袜、昔经行。至今日重来，人惟独自，花亦凋零。青鸟杳无信息，遍人间、何处觅云骈。红锦织残旧字，玉箫吹断余声。

— 源 —



销凝。衣故几时更。又谁复卿卿。念镜里
琴中，离鸾有恨，别鹄无情。齐眉处同笑语，
但有时、梦见似平生。愁对婵娟三五，素光暂
缺还盈。

清平乐

越上作

呢喃燕语。共诉春归去。春去从他留不住。
落尽枝头红雨。

老翁袖手优游。闲愁不到眉头。过了麦黄
椹紫，归期只在新秋。

又

儿曹耳语。借问何处去。家在翠微深处住。
生计一犁春雨。


客中且恁浮游。莫将事挂心头。纵使人生
满百，算来更几春秋。

浪淘沙

辛未中秋与文尉达可饮

月色十分圆。风露娟娟。木犀香里凭阑干。

— 缘 —



河汉横斜天似水，玉鉴光寒。

草草具杯盘。相对苍颜。素娥莫惜少留连。
秋气平分蟾兔满，动是经年。

卜算子

嘉定癸酉二月雨后到双溪

渡口唤遍舟，雨后青绡皱。轻暖相重护病
躯，料峭还寒透。

老大自伤春，非为花枝瘦。那得心情似少
年，双燕归时候。

又

散策问芳菲，春半花犹未。蓓蕾枝头怯苦
寒，恰似人憔悴。


人莫恨花迟，天自催寒去。雨意才收日气
浓。玉靥红如醉。

江城子

癸酉春社

清波渺渺日晖晖。柳依依。草离离。老大
逢春，情绪有谁知。帘箔四垂庭院静，人独处，

— 远 —



燕双飞。

怯寒未敢试春衣。踏青时。懒追随。野蔌山饍，村酿可从宜。不向花边拚一醉，花不语，笑人痴。

虞美人 甲戌正月望后燕来

镜中失画双青鬓。懒更占花信。小梅半谢雨垂垂。未许轻红破蕾、缀桃枝。

社前归燕穿帘语。似说人憔悴。自缘老去少欢惊。不是春寒料峭、怯东风。

南乡子 甲戌正月


云淡日曺明。久雨潺潺乍得晴。社近东皋农务急，催耕。又见菖蒲出水清。

池面縠纹平。掠水迎风燕羽轻。试出访寻春色看，相迎。巧笑花枝似有情。

忆秦娥 甲戌赏春

胭脂点。海棠落尽青春晚。青春晚。少年

— 苑 —



游乐，而今慵懒。

春光不可无人管。花边酌酒随深浅。随深浅。牡丹红透，荼蘼香远。

临江仙

吴宰生日

欲近上元人意好，月如人意团圆。暖风催趣养花天。三山来鹤驾，万户识凫仙。

手种河阳桃李树，暂时来看春妍。彩衣一笑棹觥船。明年当此日，人到凤池边。

好事近

同前

时节近元宵，天意人情都好。烟柳露桃枝上，觉今年春早。


遏云一曲凤将雏，疑是在蓬岛。玉笋扶杯潋滟，愿黑头难老。

水调歌头

留宰生日

爱日护轻暖，酝造小春时。桃溪云敛，一点郎星吐青辉。炼玉颜容难老，点漆精神如旧，

— 愿 —



不用摘霜髭。厌薄蓬莱景，戏踏两凫飞。

潘花底，陶柳外，细民肥。万家喜色，融融气拥牙绯。凭仗春葱洗玉，领略朱樱度曲，引满又何辞。只待琴歌毕，安步上丹墀。

念奴娇

海棠时过江潭

晓来雨过，正海棠枝上，胭脂如滴。桃杏不堪来此似，信是倾城倾国。藏韵收香，谁能描貌，阁尽诗人笔。从教睡去，为留银烛终夕。

不待过了清明，绿阴结子，无处寻春色。簌簌轻红飞一片，便觉临风悽惻。莫道无情，嫣然一笑，也似曾相识。惜花无主，自怜身是行客。


浪淘沙令

菊

秋色满东篱。露滴风吹。凭谁折取泛芳卮。长是年年重九日，苦恨开迟。

因记得当时。共捻纤枝。而今寂寞凤孤飞。不似旧来心绪好，惟有花知。

— 怨 —



采桑子

秋日丁香

一番飞次春风巧，细看工夫。点缀红酥。
此际多应别处无。

玉人不与花为主，辜负芳菲。香透帘帏。
谁向钗头插一枝。

好事近

早梅

玉颊映红绡，搀报东风消息。虽则清臞如
许，有生香真色。


相看动是隔年期，忍不饮涓滴。莫待轻飞
一片，却说花堪惜。

临江仙

落梅

雪片幻成肌骨，月华借与精神。一声羌笛
怨黄昏。吹香飘缟袂，脱迹委红裙。

枝上青青结子，子中白白藏仁。那时别是
一家春。劈泥尝煮酒，拂席卧清阴。



卜算子

腻玉染深红，艳丽难常好。已是人间祓禊时，花亦随春老。

唤起曲生来，醉赏惟宜早。此去阴晴十日间，点点沾芳草。

木兰花慢

暮春时在分宁


博山香雾冷，新雨过、怯单衣。正飞絮濛濛，平芜杳杳，家在天涯。春难住、人易老，又等闲过了踏青时。枝上红稀绿暗，杜鹃刚向人啼。

依依。谩叹歌生弹铗，尘满弦徽。想北山猿鹤，南溪鸥鹭，怪我归迟。青云事、今已晚，倚小窗、谁与话襟期。对酒有愁可解，擘笺无怨休题。

小重山

至后一日，长兴赵宰到郡，并招归安、乌程二宰及

— 一 —



项广文同饭

日脚才添一线长。葭灰吹玉管，转新阳。
老来添得鬓边霜。年华换，归思满沧浪。

唤客对凝香。公庭凫鹢散，缓行觴。何须
红袖立成行。清淡好，胜似听丝簧。

阮郎归

較川作

几回幽梦绕家山。怯闻梅弄残。潇潇黄落
客毡寒。不禁衣带宽。


身外事，意阑珊。人间行路难。寻思百计
不如闲。休贪朱两轓。

临江仙

莫子章郎中买妾佐酒，魏倅以词戏之，次韵

试问休官林下去，何人得似高年。壶中不
记岁时迁。吹箫新有伴，餐玉共求仙。

有客尊前曾得见，月眉云鬓娟娟。断肠刺
史独无眠。谁能闻一曲，偷向笛中传。



又

思忆故园花又发，等闲过了流年。休论升
擢与平迁。拂衣归去好，无事即神仙。

况是老人头雪白，羞看红粉婵娟。鸾孤凤
只且随缘。莫将桃叶曲，留与世人传。

水调歌头

送魏倅

新涨鸭头绿，春满白苹洲。小停画鹢，莫便
折柳话离愁。缥缈觚棱在望，不用东风借便，
一瞬到皇州。别酒十分酌，何惜覆瑶舟。


从此去，上华顶，入清流。人门如许，自
合唾手复公侯。老我而今衰谢，梦绕故园松菊，
底事更迟留。早晚挂冠去，江上狎浮鸥。

南柯子

天末家何许，津头客未归。柳梢绿暗早莺
啼。蝴蝶不知春去、绕园飞。

选胜多游冶，当垆有丽姝。青翰载酒泛晴

— 猿 —



晖。不忍十分寥落、负花时。

好事近

闲日似年长，又在他乡春暮。柳外一声鶯
鶯，怨落花飞絮。

苧罗只似旧时村，佳人在何处。试问鸱夷
因甚，载轻颺同去。

朝中措

杜鹃声断日曛曛。过雨湿残红。老色菱花影
里，客愁蕉叶香中。

柳梢飞絮，桃梢结子，断送春风莫恨春无
觅处，明年还在芳丛。


南柯子

秀叔娶妇不令人知，

以小词为贺，因戏之

对镜鸾休舞，求凰凤自飞。珠钿翠珥密封
题。中有鸾笺细字、没人知。

— 源 —



环佩灯前结，辘轳月下归。笑他织女夜鸣机。空与牛郎相望、不相随。

朝中措 九月末水仙开

蔷薇露染玉肌肤。欲试缕金衣。一种出尘态度，偏宜月伴风随。

初疑邂逅，湘妃洛女，似是还非。只恐乘云轻举。翩在飞度瑶池。

西江月

用荼蘼酿酒饮尽，因成此，漫呈继韩王 炎

蔌蔌落红都尽，依然见此清姝。水沈为骨玉为肤。留得春光少住。

鸳帐巧藏翠幔，燕钗斜亸纤枝。休将往事更寻思。且为浓香一醉。

柳梢青 郑宰母生日

葭管风微。莱衣香软，歌凤将雏。笑酌流霞，问人何处，别有瑶池。

— 缘 —

